

## 2 KORINDH

### Riown Wargahng Poal Yihr Yaa Korindh

### Rob Ke Nying Kitaab Ni

Wargahng ni beehda Poal e naa agweed ngo yihr akuud yaa yiiho gihr Korindh kedea yihr jo yiiho cang giih beed yi piny Akaayo.

Wargahng ngo agweed Poale maano e luube ge be beeye kiine kedea akuud yaa yiiho Korindh. Yaaj mooge kiin yaa ayiiho luube me reje arob gene rih Poal abea keehd maano e Poal cwihnye daahd doohr kedea ngo ateede kejea cwihnye umed nea doohr ree yuge yugo.

Warga ngo athobe kaa rob ke nying gihn ne kiine keehd akuud gihr Korindh. Arobe kejea ngo arubo ke luube me teeg ke nying ayaany kedea giih pehm yi akuud yaa yiiho. Ngo anyoadhe yihr gen thiow kejea teeg luub nu e naa ameehg doohr beehno kedea cwihnye adoohng med arumo.

Batiene e Poal arubo ke nying cub nyepinye yihr akuude giih yaa ayiiho yi piny Judea. Wiih warga agooye piny kaa rob ne jaahy ree ke nying luub rob nyoge me kang rog gen kejea ge naa yaa oohr maa adiehr abea Poal beehda ngad oohr maa ngad ucahb.

Kaa Acaan Luub Yi Warga

Lum umodho 1:1-11

Poal kedea yaa akuud Korindh 1:12-7:16

Kuny gihn cub yihr yaa ayiiho piny Judea 8:1-9:15

Poal arubo ke nying ruohdhe ge nahge ngad oohr 10:1-13:10

Gug luube 13:11-14

*Maahdh Kedea Leej*

<sup>1</sup>\* Beehda an, a Poal e akwany Juoge ne ngad oohr gihr Jeacuu Kriihjto wa ka daahd Juoge ke kar cwihnye. An maa Timodhy wado, wa naa aohr dhog gihn yihru wu akuud yaa yiiho giih Korindh kede a yihr jo ayiiho cang giih beed yi piny Akaayo.

<sup>2</sup> Beehn Juog Wuro ge ke Jeacuu Kriihjto Ruohdho cub gene muuny kede a doohr yihru.

<sup>3</sup> Muohjo koohr Juog e beehda wur Jeacuu Kriihjto Ruohdho. Juog e ne cwihnye puol, kuny kede a ciim cwihny ge aay ke bange. <sup>4</sup> Juog e ne ciim cwihnyo nea wo pahdh yihdh giih me reje. Noono, e yaa pahdh giih me reje wudh gen, cwihny gen ciimmo ciimmo thio w ke dhe yoohn ciim cwihny gihn ayoado bang Juog. <sup>5</sup> Raahm me duohng aguumo tiehd keehd Jeacuu. Wa maano thio w, e ciim cwihny me duohng uyoado tiehd keehd Kriihjto bang Juog. <sup>6</sup> Abea ke kur mar wan, nea wa ayoad gihn me raaje, e gihn nu wa ayoad e kaa nying ciim cwihnyu uyoadu boadh wahy. Nea cwihny wan aciim e beehda ke nying ciim cwihnyu thio w beere tee me romu kwaad raahm gihn ayoad wane ke guumo, wa ka guum wane gen. <sup>7</sup> Gaahno gihr wan ke nyingu yea be lwag ree bang gihn ngo ugaahn wane kejea ciim cwihny gihn acub yihr wan ngo unywaago, bang gihn giih raahm ge ayoadu wa mar wan.

<sup>8</sup> Jo wan, wa daahd ngo unghayu giih raahm ge ayoad wan yi piny Aacya. Koohm wan anaa ayihny kwaade tooro, adhaahr wudh wa anaa awaadh wane kejea kar bodho tooro yihr wan keehdo. <sup>9</sup> Anaa ngahy wane ke cwihny wan, kejea wa akim ke thoo. Beehda Juog e naa atiihyo wa maano, beere teeg wan, wa keed wan be

---

\* 1:1 1:1 Gal 1:1 Timodhy: 1 Kor 4:17 1:3 1:3 Epi 1:3; 1 Pii 1:3 1:5 1:5  
4:10; Klo 1:24 1:6 1:6-7 4:15, 17 1:8 1:8 4:8; Tiily 19:23; 1 Kor 15:32  
1:9 1:9 Rom 4:17

gaahn wane, abea wa gaahn teeg Juog ngaa weehg nyoge cahro yi thoo. <sup>10</sup> Wa abeehn Juoge ne lwahg oogo yi cing thoo muon. Kede a gaahn wane gaahno kejea wa udoge ke lwahg oogo keehdo, <sup>11</sup> nea wu ukwahyo ke nying wan beere wa kony Juoge konyo. Thiow yaa thoohdh ge kwahyo ke nying wan, kway gen yiih Juoge yiiho, ukahle wan oogo yi gihn me raaj. Ke nying gihn ayiih Juoge kwaj gih r gen kede a ke nying gihn nu e nyoge me thoohdh Juog leey gene leeyo ke nying gihn ayiihe kway gen.

*Poal Wiihe Awaare Yi Waahdhe*

<sup>12</sup> Awaahn ni, wudh wan be laahy bang gihn ngahy wane kaa aduun wan kejea rog wan angahy wane ke kaahno upiny, adoohnge yi beehdo ke wun kede a nyoge mooge. Kede a thiow gi ih atiihy wane ke nyingu ge adoohng wa Juog e naa atiihy gen bang gihn ge atiihy wane kaa tiihy ngaa maa abiohgrwaal me toohd tooro yea. Tiihy gihn nu beehn ke bang Juog kede a muuny gihre e naa ameehg wan tiihj wa gihn nu padh nud wihj gih r dhaano utaa hngo. <sup>13-14</sup> Wa be gweehdo yihru kaa nying gihn me kwihyu. Wa gweed gihn me romu ke kwaano kede a ungeyu ngo. Keehd maano, e gi ih mooge me ngahyu ke nying wan ge tooro, abea ngo gaahna gaahno kejea gi ih poohd kwihyu ke nying wan ge ungeyu cahng moogo. Nea ge angeyu, e naa ka ubahnge wudhu buu ulaahy ke nying wan wa ka ubahnge wudh wan buu ulaahy ke nyingu cahng uduu Jeacuu Ruohdhe.

<sup>15</sup> Ngo ngahya kejea gihn nu aroba beehda gihn maa adiehr. E naa gihn agweehga beehn bangu umodho beere wu dooj Juoge dooyo tiel ariow. <sup>16</sup> Ngo agweehga ne kahnho ke bangu ne lie wun, ci bara piny Macedoanya.

---

1:10 1:10 2Tim 4:18 1:11 1:11 4:15; Rom 15:30 1:12 1:12 2:17; 1Kor 1:17, 19, 31; 2:13; Judea 13:18 1:13-14 1:14 5:12; Pihp 2:16 1:15 1:15-16 1Kor 16:5-6

Nea a uduuo ke yoohn Macedoanya, e a ukahnho ke bangu keehdo. Kaano e naa ka udooj Juoge wun tiel ariow. Batiene e waahdha gwiiru gwiiru ne bar maalo ke waahdh ne ci yi piny Judea. <sup>17</sup> Ka moogo e yihru ne piehj kejea ke nying gihn e waara wiiha ke nying gihn agweehga? Ngo anaa agweehga ne cohg kejea wu uliewa ne? Wale a ngad toohd me gihn roba be tiihya wa mar dhaano maa now?

<sup>18</sup> Bekihde! Wa kaano bahnge Juog be rubo ke toohd nu, e a thiow a padh dhaano now. Gihn aroba yea be waara. <sup>19</sup> Timodhy maa Cihla kedea an wa arubo yihru ke nying Jeacuu Kriihjto Waahd Juog ge beehda ngaa me lume be waare kedea be rubo ke toohd. <sup>20</sup> Bang gihn giikh aceg Juoge piny kejea ge utiihye, ge atiihye kaa dhe yoohn Jeacuu Kriihjto. E naa gihn beehno ne rob kejea “E noono” nea wo apiih ne leej Juog. <sup>21</sup> Beehda Juog ni acielo e naa ayug wan kedea wun ne nyoge maa amag lum Jeacuu. Beehda Juog e naa akoy wan kedea wun oogo ne joe. <sup>22</sup> Alaamo akedh Juoge rogo thiow kedea ucube Wahy Juog yihro ne beehdo yi cwihnyo ne nyoadh ngo kejea wo beehda joe. Wahy Juog gihn acub e naa muuny acub ne mieg won kedea ne nyoadh giikh beeye ge uyoado.

<sup>23</sup> Juog ni acielo e naa cuud gihra ke nying gihn bahnge a kuu abeehn ne liew wun. A kuu abeehn ne liew wun beere cwihnyu be rahny bang gihn a beehn ne cuow wun. <sup>24</sup> Padh wa naa jo doong teed gihn yiihu. Abea wa utiihyo ke wun ne yug cwihnyu med bang gihn beehda yiiho gihru e ne yug wun teeg.

## 2

<sup>1</sup> Noono e wiiha apara kejea kare tooro ubeehna ne liew

---

1:17 1:17 1Kor 4:18-19 1:18 1:18 1:23 1:19 1:19 Tiihy 18:5 1:22  
 1:22 5:5; Rom 8:15-16, 23; Epi 1:13-14 1:23 1:23 11:31; 13:2; Rom 1:9; Pihp  
 1:8; 1Th 2:5; 2Th 2:10 1:24 1:24 1Pii 5:3 2:1 2:1 12:21; 1Kor 4:21

wun awaahn ni, bang leehw gihn nu kahl giih raahm rogo. <sup>2</sup> Nea cwihnyu araanya, e ngaa e nuu umeehg cwihnya doohng med? Wu naa yaa meehg cwihnya doohng med. Abea nea cwihnyu araanya, e cwihnya uyugu med ke ne diih? <sup>3</sup> E naa gihn agweeda wargahng acahng yihru, beere nea cahng beehna bangu e cwihnya be raany yaa dhiil cwihnya ke yugo med. Bang gihn cwihnya be diiw kedea ngo ngahya kejea med cwihnya beehda med cwihnyu thiow. <sup>4</sup> A agweehdo yihru ne cahng e aduuna urahmo keraahyo kedea e piih wonga ge uwaad ne cur. Keehd maano e a kuu adaahd cwihnyu ke raanyo. A daahd ngo unghayu kaa anhyaara wun kii ngo.

### *Wiiu Lubo Piny Yihr Ngaa Ayug Adhemuohm*

<sup>5</sup> Nea dhaano cwihny ngaa moogo araanye e ngo keá yugo ke riha. Ngo ayuge ke rogu cang, wale ne lwag yi gihn roba, e ngo ayuge ke rog nyoge mooge kiinu. <sup>6</sup> Ukihm gihn akihm nyoge me thoohdhe ngo keehde kiinu ngo beer wa kaano. <sup>7</sup> Gihn nud, wiiu awuohj gihre piny yihre, kedea ciihmu cwihnye, beere cwihnye be rahny unahge ngwedh. <sup>8</sup> Nyingu akwaya, umeehgu ngaan nu ngey ngo kejea ngo anhyaaru ne cohg. <sup>9</sup> Wargahng acahng anaa agweeda yihru ne tum wun ne niid ngo nea giih roba yihru ge tiihyu tiihyo cang. <sup>10</sup> Ngaa wiiu anyoohne piny yihre, e anyoohne ge wiia ke piny yihr ngaan nu thiow. Nea gihn me wii piny nud, e ngo wiia ke piny kaa tee Kriihjto kedea ke nying uyoadu gihn me beer. <sup>11</sup> Anyoohne wiia ke piny thiow beere wo be taay atiihb ukeehge, bang gihn dhog yiehdh tiihy atiihb ukeehge kii ngo ge ngahy wane.

*Tiihy Ngad Oohr Yi Troaj Kedeo Macedoanya*

<sup>12</sup> Naa a'aaya ne ci geen Troaj ne puohny Ciig Beer, e ayuuda e yoohn puohny ayab Juog yihra kun caadi. <sup>13</sup> \* Abea keehd maano, e cwihnya kuu anaa piih, bang gihn ngado e nyinge Tiihtuj kaa yoado yi Troaj. Gihn nu, e nyoge awiihwa ubara yi piny Macedoanya.

<sup>14</sup> Abea muohjo koohr Juog! Bang gihn e ne meehg won taaj jo mahn giho ke dhe yoohn Kriihjto. Kuohn coa yea e wo meehge ke rob ke nying Jeacuu ubeehn Ciig Beer unyaaye wa gihr mow me ngwaahy. <sup>15</sup> Nea yihr Juog, e gihn me ngwaahy kod nud. Gihn ngwaahy beehda Kriihjto ge anweehd won keehd Juog kedeo ngo ungwaahy kod yihr yaa wahy gen aboadh kedeo yihr yaa ci paar maaj thiow. <sup>16</sup> † Yihr yaa ci paar maaj ge ngwaahj ngwahj thoo rogo, abea yaa wahy ge aboadh ge ngwaahj kuowo rogo. Abea ngaa noono rom ke yoado me rom tiihy nu ke tiihyo? <sup>17</sup> Beehda kwaad nyoge me neehn wan. Bang gihn wa padh nyoge me daahd ngiihny ke nying puohny lum Juog neehn amahr nyoge me tiihyo wa maano. Beehda Juog ke ngude e naa aohr wan, noono, e wa rob gihn maa adiehr nyum Juog, ke nying Kriihjto.

### 3

<sup>1</sup> Ngo niidu niido adoohng wa gihr wan beehda beel e ne yug wane keehdo ke nying tiihy wan ne? Wale wu ungaahdo kejea wa daahd warga me gweeda wale me gweed yihru ke nying wan ne? Nyoge mooge me daahd warga me gweed ke nying gen nud abea padh wan ne rob

---

2:12 2:12 1Kor 16:9 \* 2:13 2:13 1Th 3:1Tiihtuj: 2Kor 7:6, 13-14; 8:6, 16, 23; 12:18; Gal 2:1, 3; 2Tim 4:10; Tii 1:4Macedoanya: 7:5; Tiihy 20:1 2:15 2:15 1Kor 1:18 † 2:16 2:16 Ngaa rom ngo ke tiihyo: 3:5-6 2:17 2:17 4:2; Pihp 1:15-17; 1Th 2:3, 5, 10; 1Pii 4:11 3:1 3:1 5:12; 10:12; Tiihy 18:27

ngo kejea tiihy wan beer! <sup>2</sup> Warga me daahd wane bangu tooro bang gihn wu ke ngudu, wu naa wargahng daahd wane. Yaa niid kaa alogu rogu udoohngu ne nyoge me beeye, e ngo rob gene robo kejea wa atiihyo ke tiihj me beer. <sup>3</sup> Ngo uneehno kejea wu beehda warga maa abeehno ke yoohn bang Jeacuu ke dhe yoohn tiihy wan. Wargahng ngo kuu agweed kaa galam wa ka na gweehd nyoge yi warga. Wahy Juog e naa galam kede a gweed naa yi aduun dhaano abea ngo kuu agweed rih leelo.

<sup>4</sup> Wa rom rob giij me beeye wa giij ni bang gihn Juog gaahn wane gaahno ke nying Jeacuu. <sup>5</sup> Wa be rob ngo kejea yihr wan ne tee mar wan me koohb wane kejea gihn beehda wan naa atiihy ngo ke nying giij nyepinye cang. Abea tee wan beehda tee me aay ke bang Juog. <sup>6</sup> Beehda Juog e ne cub tee yihr wan ne rob dhe yoohn anweehd gihn nyaahn yihr nyoge. Ngo padh dhe yoohn loohng agweed yi leelo abea ngo beehda dhe yoohn Wahy Juog. Bang gihn dhe yoohn loohng agweed yi leelo beehda dhe yoohn thoo abea Wahy Juog e ne cub kuowo.

<sup>7</sup> Loohng giijr Moaje naa agweed rih leelo, kede a ge kahl thoo, ngo anaa abeehno ke tee Juog. Tee maa atoor ka maa arom yaa dhaahr Yijaraele meehg nying gen tal ne maany wong Moaje bang gihn kaan nyinge ake liel wa meehr cahng. Keehd maano e tee ngo anaa abeehn ne aay maahdh maahdh. <sup>8</sup> Ka nahge loohng Moaje e yea ne thoo e ne kahl tee wa maano, e Wahy Juog e kahl kuowo, yihre unaa tee me ngihde arumo? <sup>9</sup> E thiow, nea loohng giijr kihm nyoge ke gihn me raaj ge ne kahl tee me wa maano, e loohng giijr yug nyoge naa abiohgrwaale ke Juog ge ukahl tee me ngihde? <sup>10</sup> Nea kare ne cohg tee

---

3:2 3:2 1Kor 9:1-2    3:5 3:5 2:16; Rom 15:18    3:6 3:6 Jon 6:36; Rom 7:5-6;  
8:2, 6, 10; 1Kor 11:25    3:9 3:9 Rom 8:2, 33; Gal 3:10

mar umodho kare tooro uroome keehd tee mar dhe caahn bang gihn mar umodho uroomo wa gihn me tooro abea mar dhe caahn beehda gihn me duohng keter. <sup>11</sup> Ka nahge anweehd mar Moaje e kuu aceng keraahyo e ne yihre anaa tee wa maano, e anweehd mar Wahy Juog e be gug, yihre unaa tee me ngihde?

<sup>12</sup> Naa adoohnge e gaahno me wa gihn nu nud yihro, e wo rom rob e lwahr tooro rogo. <sup>13</sup> Wo be neehn Moaje naa ageehng wonge oogo ke waaro yihr yaa dhaahr Yijarael. Wonge ageehnge oogo yihr gen beere be ngey gene kejea tee gihn aweehg wonge liel wa kong ngo uaay maahdh maahdh. <sup>14</sup> Abea wudh gen ayug gene ne thihdh thihdh. Keehd awaahn ni, ge kwaan gene giih anweehd acoon e nying gen beehde e ge awum udoohnge wa ge awum kaa waahny anaa ageehng Moaje wonge keehde. Nying gen poohd e awum bang gihn beehda Jeacuu e ne kahl waahny ngo oogo yi nying gen. <sup>15</sup> Uwahnhe cahng tihn, ge kwaan gene loohng gihr Moaje e aduun gen adoohng wa ge awum ke waahr Moaje. <sup>16</sup> Abea nea dhaano ree amade bang Ruohdh e waahr anaa awum yi wonge kahl oogo. <sup>17</sup> Ruohdh e naa Wahy Juog, kedea Wahy Juog e ne cub laahw wihj yihr nyoge. <sup>18</sup> Abea wo ge ayiih lum Juog nyingo ge kuu awum. Tee Ruohdh ke niido rogo ge keehlo nyingo ree. Kedea Ruohdh ge beehd Wahy Juog utiihyo rogo ne log won maahdh maahdh udoohngo wa en yi cahdo gihre.

#### 4

<sup>1</sup> Caahn e Juog e naa acub wan ne tiihy tiihye ke dhe yoohn aduue cwihnye caahn rogo. Kedea cwihny wan be daag. <sup>2</sup> Abea gihn nud kwaad giih yaahr kuohm ge tiihj ke piny, ge awii wane. Giih waan yej ge tooro yihr wan,



kedeala lum Juog yea be waar wane. Abea gihn nud thiw wa bar maalo ke puohny adiehj lum Juog beere e ngahy kwaad dhaane kejea wa rob adiehr nyum Juog. <sup>3</sup> Awaahn ni, Ciig Beer e puohny wane, nea ngo agoohg ke ngeyo, bang gihn awum waare piny, e ngo awum ke waaro ke yihr yaa arwaahnyo. <sup>4\*</sup> Yaa kuu ayiiho wudh ge aciehg atiihb ukeehge ge e naa ruohdh gihr giij wiij piny beere tee daahr gihn beehn ke dhe yoohn Ciig Beer kedeala kaa amoar Ciig Beere wiij Kriihjto ge neehn Juog kii ngo be rom gene ke niido. <sup>5</sup> Ge puohny wane, e wa be rubo kaa nying wan. Wa rubo kaa nying Jeacuu Kriihjto ge beehda Ruohdh. Abea ke nying wan, wa rob gihn: kejea wa beehda baahng me tiihyo yihru ke nying tiihy Jeacuu rog wan. <sup>6</sup> Bang gihn Juog ngaa arob ngo kea, “Beehn daahre nude yi muudho,” e naa ayab wudh wan ungey wane ngo kejea daahr gihre kedeala teege ge niid ke rih Jeacuu.

### *Giih Raahm Kedeala Giih Gaahn Ngad Oohre*

<sup>7</sup> Abea daahr kedeala tee gihr Juog ge wa dhaahb, ge acub yi koohm wan ge room wa dag ge thow. Ge acub gen yi gihn me thow, e nyoadh ngo kejea daahr kedeala tee ge aay ke bang Juog padh ke bang wan. <sup>8</sup> Giih me reje ge pahdh wudh wan ke dhog yiehdhe beehde abea yihdh wan be baadh. Ka moogo e wudh wan ke lyaahbo, abea aduun wan be kuong ngolo, uwii wane gihn nu piny. <sup>9</sup> Nyoge ubuohj ke kedh bahng rog wan abea Juog wa be paahle oogo. Ngwiilo kedh rog wan abea wa be thow. <sup>10</sup> Koohm wan ge giij me nii thoo wa mar Jeacuu. Gihn nu nyoadh ngo kejea Kriihjto ngaa kuow e ne cub kuowo yihr koohm

---

4:3 4:3 1Kor 1:18 \* 4:4 4:4 Jon 12:31; Epi 2:2Neehn Juog: Klo 1:15; Judea 1:3 4:5 4:5 1:24 4:6 4:6 2Kor 3:18; 1Pii 2:9 4:8 4:8 1:8; 7:5; 11:23-29 4:10 4:10 1:5; Rom 6:8; Gal 6:17; Pihp 3:10-11

wan. <sup>11</sup> Bang gihn wa ge koohm wan kuow, rog wan kwaay wane kaa yoado yi thoo ke nying Jeacuu. Noono e kuowo gihr Jeacuu ree nyoadhe nyoadho yi koohm wan ge thow. <sup>12</sup> Gihn nu nyoadh ngo kejea wa beed yi thoo abea maru wu beed yi kuowo.

<sup>13</sup> Ngo agweed yi kitaab Juog naa, “A arubo bang gihn a ayiiho.”

Ke dhe yoohn kwaad yiih nu, e wa arubo bang gihn wa ayiiho. <sup>14</sup> Bang gihn ngo ngahy wane kejea ngaa aweehg Jeacuu Ruohdhe cahro batien thoo, wa uweehge cahro tiehd ke Jeacuu ukahle wan kedea wun ne cuung nyume.

<sup>15</sup> Giih ni cang ge yuga kaa nyingu, beere yaa yoad muuny Juog rog gen jwag gene jwaa kiinu. Noono umeehg muuny Juoge muohj koohr Juog ne moar wiihe jwag ree.

<sup>16</sup> Ke nying gihn nu e ne bahnge cwihny wan kuu adoohng bahw. Keehd me beehde koohm wan uthumo yi goohg ke nying nihn e cwihny wan kaa alongthihn, tee jwage jwago ke nying nihn. <sup>17</sup> Nye giih reje ge apahdh wudh wan ge aguo bar ne leew uyoaad moar wihj me guge tooro akahl gene rog wan. <sup>18</sup> Nea maano e wudh wan be cub wane rog giih niid dhaano utaaahge ke wonge bang gihn kwaad giih nu ge ugug. Wudh wan cub wane ke rog giih me be rom guuo ne weey weey ge be niid ke wong.

## 5

### *Kar Beehdo Gihro Paar Juog*

<sup>1</sup> Ngo beehda gihn me ngahyo kejea nea koohmo ge beehdo wiih piny ke gen ge uthoo, e yihro unaa koohme me be thow Paar Juog maalo. Koohm nu ge uneehn wuude

---

4:11 4:11 Rom 8:35-36; 1Kor 15:31    4:12 4:12 Klo 1:24    4:14 4:14 1Kor 6:14; Rom 8:11    4:15 4:15 1:5-6, 11; 9:11, 15    4:16 4:16 Epi 3:16    4:17 4:17 3:18; Rom 5:2; 1Pii 1:6-7    4:18 4:18 Rom 8:25; Judea 11:1    5:1 5:1 2Pii 1:14

me Juog e naa ageer gen abea padh dhaano utaaingo. <sup>2</sup> Abee awaahn ni, wa agoohg bang gihn cwihny wan ayuohd ne laar mon yihdh wuud ageer Juoge udooonge wa waare me nyaahn ge naa angaab rog wan. <sup>3</sup> Bang gihn nea wa angahbo ke waare me nyaahn e wa be cahg ke yuudo ne nyoge maa alony. <sup>4</sup> Nye nihn ni poohd e wa ubeehdo ke koohme gihi wihi upiny kan, wa agoohg ke nying gihi reje naa apahdh wudh wan. Wa be daahd ngo utoor waare rog wan. Tooy waare rog wan nyoadh ngo kejea koohm wan ge tooro. Abee wa daahd ngo umon wane yi wod ageer Juoge udooonge wa waare me nyaahn ge naa angaab wane. Kaano e gihn thow ngo umuony gihn yihre ne kuowe. <sup>5</sup> Beehde Juog ke ngude e naa agwiir wan ke nying gihn ni. Noono, e Wahy Juog acube yihr wan ne mieg wan kedea ne nyoadh gihi beeye ge yoad wane.

<sup>6</sup> Gihn nu cwihny wan ameehge ngahmo, kedea ngo ngahy wane kejea ge poohde e wa ubeehdo ke koohme gihi wihi piny kan e nyoadh ngo kejea wa poohd baahr ke Jeacuu Ruohdh. <sup>7</sup> Yiho e ne kaahn yi beehdo gihro ke nying nihn abea padh gihn niid e ne kaahn. <sup>8</sup> Cwihny wan angahmo kedea wa daahd ngo uwii wane koohme gihi wihi piny kan piny beere wa mahd paar Ruohdh Jeacuu. <sup>9</sup> Gihn moogo me daahd wane tooro. Abee wa daahd cwihny Juog ke yugo med awaahn ni, keehd me ne wane upiny kan ke koohme wale rog wan amad wane Paar Ruohdh Jeacuu. <sup>10</sup> Wo cang, wo ucuung nyum Jeacuu cahng Lug gihr Juog. Noono, e kwaad dhaano cang kihm kaa kwaad gihn anaa ayuge upiny kan. Gihn beer ke gihn raaj naa ayug dhaane e ngo kaahn kuohm gihn ne ree

---

5:2 5:2 Rom 8:23-24    5:4 5:4 1Kor 15:53-54    5:5 5:5 1:22    5:7 5:7  
 1Kor 13:12; 1Pii 1:8-9    5:8 5:8 Pihp 1:23    5:9 5:9 Klo 1:10; 1Th 4:1    5:10  
 5:10 11:15; Tiihy 17:31; Rom 2:6; 1Kor 3:13-15; 4:5; Pihp 3:19; 2Th 1:7-10

awaahn ni.

*Tiihy Ngad Oohr*

<sup>11</sup> Lwahr ke nying ukihm e naa gihn amag wane yi wudh wan. Noono e wa buohj kaa tiihj ne meehg nyoge me thoohdh yiih lum Juog. Juog cwihny wan ngahye kejea wa rob adiehr. Thiow gaahna gaahno kejea yi cwihnyu alongthihn, ngo ngahyu kejea wa rob gihn maa adiehr. <sup>12</sup> Jo wan, gihr wan padh beel e ne tum wane nyumu keehdo. Wa daahd ngo uyoadu dhe yooh me beelu udoohng wudhu mor ke nying wan. Wa daahd ngo thiow uromu luube ke beehro yihr yaa beel ke nying giih niid ke wong ukwihy gene muu par kaa aduulo. <sup>13</sup> Nea wa utiihyu wa nyoge me wudh gen arahnyo e wa tiihyo ke yihr Juog. Abea nea wa tiihyo wa nyoge me wudh gen kwel, e wa tiihyo ke yihru. <sup>14</sup> Wa tiihyo wa gihn nu kaa nying nhyaahro gihr Jeacuu. Ngahy wane kejea Jeacuu e acielo cog, athow e keede ke nying nyoge cang. Gihn nu nyoadh ngo kejea nyoge cang, thoo ayoad gene keehd Jeacuu tiehd. <sup>15</sup> Jeacuu athow ke nying nyoge cang beere yaa wahy ge aboadh, rog gen mad gene ke bang Jeacuu. Wa maano, e ge be rom beehdo ke kar wudh gen keed gen keehdo abea ge beehdo kaa nying Jeacuu ngaa athow ucahre ke nying gen.

<sup>16</sup> Nea maano, e wa be cahg rob rih ngaa moogo wa ka rub dhaano utaahnge ke luub wiih piny kan. Umodho coon keehd Jeacuu, e wa anaa arubo ke nyinge ke luub wiih piny ge rob dhaano utaahnge. Awaahn ni gihn nu be cahg wane ke robo ke nyinge.

<sup>17</sup> Noono, nea dhaano amahd bang Jeacuu, e ngaa nu beehda ngaa me nyaahn. Dhe yoohn ka na beehd ngaa nu

---

5:11 5:11 4:2; 6:4; 1Kor 9:22    5:12 5:12 1:14; 3:1    5:14 5:14 Jon 17:23;  
Rom 8:35; Gal 2:20; Epi 3:19; 5:2, 25; 1Jon 3:16    5:15 5:15 Rom 6:3-4; 7:4;  
14:7-9    5:17 5:17 Rom 6:4; Gal 6:15; Epi 4:24; Any 21:5

kii ngo ree waare waaro ubeehde ke dhe yooh me nyaahn.

<sup>18</sup> Giih nu cang, Juog e naa ayug gen. Wa anaa anahg yaa mahn giih Juog, abea awaahn ni, wa aloge udoohng wane ne gome ke dhe yoohn Jeacuu. Tiihy acub Juoge yihr wan ne kony nyoge mooge thiow udoohng gene ne gome.

<sup>19</sup> Gihn teed wane e gen: Juog gom amage keehd nyoge cang ne raj ke nying Jeacuu. Anyoohne giih nyoge ge be mag Juoge yi cwihnye keehdo. Kedea ubeehn Juog ucube loohng gihn meehg nyoge doohng ne gome keehde yihr wan.

<sup>20</sup> Awaahn ni, wa beehdo ruohdh apiile giih Jeacuu ge rubo ke leeb Juog. Wu akway wane ke nying Jeacuu udoohngu ne gome ke Juog. <sup>21</sup> Ngahyo cang kejea Jeacuu kihd anyoohne tooro ree. Abea keehd maano, e ngo akaab Juoge ucub adhemuohme giiho cang wiihe. Wiih gihn nu aduog Jeacuu naa ameehge won doohng naa abiohgrwaale nyum Juog.

## 6

<sup>1</sup> Yi tiihy tiihy wane tiehd ke Juog ke ngude, nyingu akway wane ubahng muuny giih ayoadu bang Juog wudh ge be taay piny now. <sup>2</sup> Bang gihn Juog arubo kea,

“Ge ayuogi,

e lani apahdh yi yihdha nye wong kaa ngo

kedea cahng boadh wahy e naa cahng akonya yihn.

Duoni ake lihngo kedea cahng daahdi

boadh wahy en naa cahng roma yihn ke konyo.”

Ngo teeda teedo yihru kejea awaahn ni e naa nye kaa ngo kedea awaahn ni e naa cahng boadh wahy.

---

5:18 5:18 Rom 5:10 5:19 5:19 Rom 3:24-26; Klo 1:20 5:20 5:20 Mat  
10:40 5:21 5:21 Jon 8:46; Rom 8:3; 1Kor 1:30; Gal 3:13; Judea 4:15 6:1  
6:1 Rom 5:2; 1Kor 15:10 6:2 6:2 Luk 4:19-21

<sup>3</sup> Wa be daahd uciehg wane dhe yooh yihr kwaad dhaano now, beere giij nyooro me yoad yi tiihy wan tooro. <sup>4</sup> Adiehr muon, yi kwaad giin tiihy wane e wa daahd unyoadh wane ngo kejea wa tiihy ke yihr Juog. Giij raahm rog, maa ngoohng wong ke raahm cwihny ge aguum wane. <sup>5</sup> Wa apuohd, wa akedh yi thijin, wa atieg amahr nyoge me daahd wan ke naah, wa abuhj ke tiij me teeg, maa amahr niin ge anahg wane e wa be nen, wa abeehdo ke niin e cam me yoad wane tooro. <sup>6</sup> Dhe yoohn kaa atiihy wane kii ngo, ke cwihny wan me cang kede a dhe yoohn ka ngahy wane Ciig Beer kii ngo maa dhe yoohn guum giir wan, kede a dhe yoohn beero, giij nu ge nyoadh ngo kejea wa tiihyo ke yihr Juog. Wa utiihyo kaa dhe yoohn Wahy Juog ke nhyaauro me ne cohg. <sup>7</sup> Wa beehdo ke wiij adiehr kede a kwaad giin tiihy wane ngo tiihy wane kaa tee Juog. Giij beeye ge tiihy wane ge naa toong giij kag wane ke gen kede a ge naa giij koar wane rog wan ke gen. <sup>8</sup> Giin e ne be tiij rog wan! Wudh wan ke moaro kede a koohm wan ke dhahlo. E thiow, wa ke yenyo maa wa ke leeyo, kede a nyoge ungaahdo kejea wa beehda yaa toohd keehd me rob wane ke giij maa ather. <sup>9</sup> Wa ke jaahyo naa wa kwihj, abea kihd dhaano acielo me kwihy wan tooro. Wihj awaadh oogo rog wan neehn nyoge maa athow keehd ma kuow wane. Bahng me duohng ayoad wane abea wa kuu athow. <sup>10</sup>\* Keehd maa ameehg cwihny wan rahnyo, e wa poohd e wa beehd kaa med cwihny. Wa ke niido ne nyoge maa angoohng, abea cwihny wan med bang nyoge me thoohdh ge ayug wane udoohng gene ne

---

6:4 6:4 4:2    6:5 6:5-10 11:23-29    6:6 6:6 8:24; Rom 12:9; 1Kor 13:4-7; Gal 5:22-23; 1Tim 4:12    6:7 6:7 10:4-5; Rom 13:12; 1Kor 2:4    6:9 6:9 4:10  
\* 6:10 6:10 Med cwihny: 7:4; Rom 5:3; 12:12 Nyoge maa angoohng kede a nyoge maa alony: 8:9; Pihp 2:17; 4:12-13; 1Th 1:6

## 2 Korindh 6:11      15      2 Korindh 6:18

nyoge maa alony. Wa ke niido wa nyoge me kihd gihn me ne yihr gen tooro, abea gahng, kwaad gihr ukuom cang nud yihr wan.

### *Lum Toohn*

<sup>11</sup> Goma maa anhyaara ge beed yi geen Korindh, wa arubo yihru e cwihny wan athaar ke wun e wa be tud kede a gihn me kan wane tooro. <sup>12</sup> Cwihnyu padh athaar ke wan abea cwihny wan athaar ke wun. <sup>13</sup> A urubo yihru awaahn ni wa a rubo kaa nyethen yeya. Caahn e kea tiihyu yihr wan udoo hng cwihnyu naa athaar ke wan wa ka nahg cwihny wane athaar ke wun. Cwihnyu keá diiw rog wan.

<sup>14</sup> Keá themu piny kejea wu piih ne tiij tiehd keehd yaa kuu ayiih Juog. Gihn e ne mad ngaa maa abiohgrwaal keehd ngad anyoohne? Wale gihn e mad daahr ke muudho? <sup>15</sup> Kare nud ubeehn Jeacuu kede a atiihb ukeehg umad gene lubo acielo ne? Caahn e ngaa maa ayiih Juog, kede a ngaa me kuu ayiih Juog gihn me mad gen tooro thiow. <sup>16</sup> Gihn e ne nweehd wod Juog keehd giij tieng ke cingo ne dhe yoohn wuor Juog. Wo beehda akuud yaa yiiho, wo naa wod Juog. Juog ngaa cub kuowo. Wa kaa ateed Juoge ngo kea,

“Paara ukeehla piny keew jo'a  
kede a ubeehda kiin gen  
beere a udoo hng ne juog gihr gen  
kede a ge beehda yaa'a.”

<sup>17</sup> Kede a maa ateed Juog Acie hge ngo kea,  
“Nyiigu rogu oogo buud gen  
ubahnge wu be neehn gen.

Giij maa aroba kejea ge reje, ge keá gweelu.

<sup>18</sup> Kaano arumo e wu uyuga ne yaa'a.

A unahg wuro yihru kedea wu unahg nyethena.”

## 7

<sup>1</sup> Goma maa anhyaara keraahyo, amahr giikh ge giikh maa arob Juoge kejea ge utiihye ke nyingo. Caahn e luogo koochmo kedea wahyo ne cal cal utoor anyoohne rogu. Beehdo e adhemuohm tooro rogo kedea beehdo e wo lwaahr ke Juog kedea tumo rogo ke yugo wa en ne cohg.

<sup>2</sup> Yiihu unahg cwihnyu athaar ke wan. Wa beehda nyoge me gihn me raaj be yug wane rih dhaano, kedea giikh dhaano maa araany wane ge tooro, wale ngaa maa awaal wane tooro. <sup>3</sup> Padh cayo e ne caya wun. Wa gihn anaa aroba umodho coon ngo ngahyu. A anaa rubo kejea wu ayiikh wane kedea cwihny wan athaar ke wun. Keehd me nahge giikh wahy wale thoo e gihn me paahng keewo tooro. <sup>4</sup> Cwihnya be diiw ke wun. Wiha mor ke nyingu. Giikh bahng ge guuma guumo ke med cwihny me duohng ke nyingu.

### *Poal Adoohd Tiihtuje Macedoanya*

<sup>5</sup> Naa awahdh wane piny Macedoanya, e wa kuu arom yuohmo. Wa anaa atieg piny. Nyoge mooge yi geew ge ataahny rog wan kedea cwihny wan kuu anaa apiikh thiow ke nying lwahr. <sup>6</sup>\* Abea Juog ngaa ciikh cwihny dhaano me nii gihn raaj, cwihny wan ameehge ngahmo naa awahn Tiihtuje. <sup>7</sup> Padh wahnho giikh Tiihtuj e keede e naa aciikh cwihny wan. Gihn aciikh cwihny wan thiow beehda giikh arobe ke nyingu. Arobe kejea bang wan acanu keraahyo kedea wu daahd uniidu wan. Arobe kejea cwihnyu arahnyo ke nying giikh atiihy rog wan. E thiow

---

7:1 7:1 1Jon 3:3    7:2 7:2 6:13; 12:17    7:3 7:3 6:11; Pihp 1:7    7:4 7:4  
6:10    7:5 7:5 2:13; 4:8    \* 7:6 7:6 1:3-4Tiihtuj: 2:13



arobe kejea gihn me raaj koaru ke oogo riha. Giih nu cang cwihnya ayug gene med keraahyo kwaade tooro.

<sup>8</sup> Keehd maa arahny cwihnyu ke nying warga gihn anaa agweeda yihru, e gihn anaa agweeda warga ke nyinge be maana. Adiehr, nye rahny cwihny me thiin anaa anudo, bang gihn cwihnyu aranya abea rahny cwihny gihn ngo yea cuog. <sup>9</sup> Awaahn ni, cwihnya med. Med cwihny gihra kuu abeehno kaa nying gihn ayuga gihn me arany cwihnyu. Ngo abeehno kaa nying gihn abeehn rahny cwihnyu umeehge wun wii anyoohne giihu piny. Rahny cwihnyu abeehn Juoge ne loo ne gihn me beer. Noono gihn me raaj maa ayug wane rogu tooro. <sup>10</sup> Rahny cwihny me Juog e naa ayug ngo ne log cwihny dhaano uyoade boadh wahy, padh rahny cwihny me maan. Kwaad rahny cwihny ke nying giuh ungoom kan, e ne kahl thon wahy. <sup>11</sup> Maahnyu kaa alog Juoge wun kii ngo batien rahny cwihny gihn ayug ree yihru. Be niidu kaa ameehge wun cub wudhu yi tiij ne? Thiow, kaa aweehge wun cub wudhu ne goony ngudu oogo yihdh giuh arob rogu ne? Niidu kaa acube rahny cwihny yihru ke nying giuh arob rogu. Niidu kaa aweehge wun diero ubahnge cwihnyu be piij piny. Niidu kwaad kaa ayuohd cwihnyu rog gen, keda kwaad giuh miidh rog e nud yihru. Be niidu kaa ameehge wun kihm ngaan ayug awuohj ne? Gihn nu nyoadh ngo kejea awuohj tooro rogu yihdh giuh nu cang. <sup>12</sup> Wa maano, keehd maa anaa agweeda warga yihru, ngo kaa gweedo kaa nying ngaan ayug gihn me raaj. Keda ngo kaa gweedo thiow kaa nying ngaan ayug gihn me raaj ree. Ngo agweeda ne nyoadh ngo yihru ne cohg nyum Juog kejea wa ngahyu kaa kaahno. <sup>13</sup> Giih ni akwaana cang, ge naa ameehg cwihny wan ngahmo.

Cwihny wan kuu angahmo kaa nying giinh nu keed gen! Cwihny wan angahmo thiow naa aniid wane mihn cwihny Tiihtuj, bang giinh, wun cang ngo akonyu utoor giinh maa adiere keehd ngo. <sup>14</sup> Leej giinh aleeya wun nyum Tiihtuj ngo apahdh kare. Wiiha kuu alaahyu. Me neehn kaano atoor toohd maa akuong wane ke teedo yihru, thiow beel giinh abeel wane ke nyingu yihr Tiihtuj ngo kuu anahg toohd. <sup>15</sup> Awaahn ni, nhyaahro gihr Tiihtuj yihru ree ajwage keter. Ree jwage jwaa ge pare ka na wuoru leebe kii ngo wu ke karu cang, kede ge pare dhe yoohn kaa aloru ngo e rogu ne kwaj kwaj ke lwahr rogu nyum Juog. <sup>16</sup> Cwihnnya med keraahyo rogu, bang giinh kare nud ugaahna wun ke cwihnnya acielo.

## 8

### *Muuj Beer*

<sup>1</sup> Jo wan, wa daahd ngo unghayu muuny giinh acub Juoge yihr akuude giinh yaa yiiho giinh piny Macedoanya. <sup>2</sup> Giinh bahng me reje ge ameehg pahdh wudh gen ne tum gen. Abea keehd maano e ge nyoge maa abeehdo e cwihny ge med, noono e ge anahg yaa muuj me kwaade tooro keehd maa anud deeh ngoohngo me duohnge rog gen. <sup>3</sup> A rob giinh maa aniida ke wonga yihru. Ge umuuyo, giinh nud yihr gen e cub gene cubo kede ge giinh tooro yihr gen daahd gene daahdo ne cubo. <sup>4</sup> Ngo apar gene ge keed gen maa akway gene nying wan kejea, yiih gen ne mad kiin yaa cub giinh nyepinye ke nying akuud yaa ayiiho yi piny Judea bange udoohng wudh gene mor. <sup>5</sup> Giinh acub gene, ge akaal wudh muu anaa apar wane kejea ge ucub gene. Giinh atiihy gene umodho beehda rog gen e naa agwaay gene yihr Juog. Batiene ugwaay gene rog gen yihr wan thiow

wa ka daahd Juoge. <sup>6\*</sup> E naa gihn kway wane wong Tiihtuj, bang gihn Tiihtuj e naa ngad umodho ge ameehg cwihnyu ngahmo umuoju nyoge muojo. Wonge akway wane beere beehn bangu ne thaahb tiihy muoj nyoge keewu ke nying Juog. <sup>7</sup> Wu alony ke kwaad giij me thoohdh. Yiiho gihru ngo duohng. Yihru ne nyoge me thoohdh me ngahy puohny lum Juog. Kede a giij me thoohdh ge ngahyu. Wu nyoge maa acub wudhu yi tiihy Juog kede a wa anhyaaru ke deeh nyaahro me duohng ne cohg. Awaahn ni adaahd wun ulonyu thiow ke dhe yoohn muuj ke med cwihny.

<sup>8</sup> Padh loohnge ge ne gweeda piny yihru, abea a daahd utuma wun nea wu nyoge muu unhyaahro ne cohg kede a nea yaa cwihny gen koag ke yuohd yi muuj ge yoohmu yoohmo. <sup>9</sup> Muuny gihr Jeacuu Kriihjto Ruohdho ngo ngahyu. Ngo a'aay yi lonyo gihre udoohnge ne ngaa maa angoohng ke nyingu. Ngo abeehn yi ngoohngo beere lonyo kahle ke yihru.

<sup>10</sup> Ke kur mara, gihn daahda ke nying lum ni e man: ngo beer uyoadu tiihy anaa atiihyu ne caahngo, uthaahbu ngo awaahn ni. Bang gihn anahg wun naa athob tiihy muoj nyoge umodho. Padh thob ngo keede, abea anahg wun naa yaa umodho naa acub rogu yi tiihy muuj. <sup>11</sup> Baru maalo uthaahbu tiihy nu. Cubu cwihnyu ne thaahb tiihy nu, wa kaa anaa acubu cwihnyu ne thob ngo, kede a thaahbu ngo ke kwaad gihn ne yihru. <sup>12</sup> Bang gihn nea agweehg dhaane ke cwihnye kejea e daahd muuj, wale e daahd nyepiny ke tiihyo, e gihn cube wale gihn tiihye yiih Juoge yiiho yihre, kede a gihn me rom dhaane ke cubo wale ke tiihyo ngahy Juoge.

---

\* 8:6 8:6 Tiihtuj: 2:13      8:7 8:7 1Kor 1:5; 16:1-3, 24; Gal 6:10      8:9 8:9  
Mat 8:20; Pihp 2:6-7      8:10 8:10 1Kor 7:25      8:12 8:12 Mak 12:43

<sup>13</sup> Kony rog e roba ni, a be teed ngo kejea paahngu giihu oogo cang udoohngu yi ngoohngo me raaj abea ngaan amuoju ngo adoohng yi lonyo. A rob ngo kejea giih nud yihr dhaano nud gene yihr kwaad dhaano cang. <sup>14</sup> A teed ngo kejea yihru ne nyepinye awaahn ni, noono, e kare nud ukonyu yaa angoohng. Nea cahng moogo kejea lonyo aluuny yihr gen e wu dog gene kaa konyo keehdo. A daahd ngo unywaagu giih nyepinye beere wu uroomu tiehd. <sup>15</sup> Neehn kaa agweede yi kitaab Juog naa, “Ngaa acong amahr giih me thoohdh keraahyo, giih me thoohdh keraahyo utooro yihre, abea ngaa acong giih me noog ngo be daag.”

### *Tiihtuj Aoohr Korindh*

<sup>16</sup> Juog koohre amuohtj wane naa ameehge Tiihtuj kony wun neehn kaa anhyaar wane kony wun. <sup>17</sup> Tiihtuj lum arob wane yihre ayiihe ke med cwihny. Cwihnye anaa ayuohd ne kony wun adhaahr keehd me bahnge be ne rob wane yihre e waahdhe anudo ne ci bangu. <sup>18</sup> Ngo caahdh kaa ngaa maa aoohr wane bangu. Ngaan ngo beehda ngaa me ke wuoro keraahyo kiin akuud yaa yiiho ne dug. Ngo ke wuoro bang gihn tiihye ucaahdho beer yi puohny Ciig Beer. <sup>19</sup> Kede a thioh, anahg akuud yaa yiiho ge naa akwany ngo beere ucaahdho ke wan ne kahl giih acub yihr yaa acub gen yihr gen. Giih nu ge acub yi cing wan ne moar wiih Jeacuu Ruohdh kede a nyoadh ngo kejea wudh gen acub wane ne kony. <sup>20</sup> Abea wa be daahd ucay wan kejea giih acub yi cing wan ge kwihy wane kaa maa. <sup>21</sup> Wa be ubuohj ke tiihj ke gihn maa adiehr nyum Juog cog, abea wa ubuohj ke tiihy gihn maa adiehr nyum dhaano utaahngo thioh.

<sup>22</sup> Ngado moogo thioh me oohr wane keehd ge Tiihtuj nud. Ngo atum wane tiel me thoohdh uyoahd wane ngo e

beehda ngaa maa acub cwihnye ne tiihj yihr Juog. Thiw ngo aniid wane awaahn ni kejea ngaan ngo cwihnye acube yi tiihy ni, kedea cwihnye be diiw ke wun. <sup>23</sup> † Ke kur mar Tiihtuj, ngo beehda ngaa me tiihy wan beehda acielo keehde ke nyingu. Yaa muu nu caahdh keehd Tiihtuj ge naa akwany yaa akuud yiihoe ne nyoge me rubo ke nying gen kedea ge ne moar wiih Ngad Boadh nyoge. <sup>24</sup> Nea wa maano kea nyoadhu nhyaahro gihru me ne cohg yihr yaa ni beehn bangu uniid akuud yaa yiihoe ngo cang, kedea ne niid gihn beel wane ke nyingu.

## 9

<sup>1</sup> Kare tooro yihra udog a gweed yihru ke nying oohr giih nyepinye yihr yaa yiiho giih beed piny Judea. <sup>2</sup> Ka me dog a gweed ke nying gihn nu tooro, bang gihn ngahya kejea cwihnyu acubu ne cong giih me oohru ne kuny. Tiihj gihru aleeya keraahyo yihr yaa piny Macedoanya. Ngo ateeda yihr gen kejea, ke ne caahngo e yihru anaa giih maa adaahdu kaa oohro. Tiihy maru naa alihng gene e naa aweehg amahr nyoge kiin gen deed cwihny gen ne tiihj wa maru. <sup>3</sup> Awaahn ni, yaa yiiho ge noono oohra bangu beere nhyaam gihn anhyaama ke nyingu be doohng ne toohd. Bang gihn, ngo angahya kejea wu uyuud gene e giihu ge agwiiru wa kaa aroba ngo. <sup>4</sup> Bang gihn nea a beehn bangu, e wa caahdh kaa ngad Macedoanya uyuud wane rogu kuu agwiiru e yaahr kuohm me duohng wa uyoade ke nying gaahno gihn agaahn wane wun. Abee yaahr kuohm maru padh a nuu urob ngo. <sup>5</sup> Wa maano, ngo aniida kaa ngweehn me oohra ge Tiihtuj ne moon bangu beere amahr giih akobu kejea ge acongu ne cubo ge gwiir gene gwiir, beere ge wahnha kea yuuda giih acubu ne

† 8:23 8:23 Tiihtuj: 2:13 8:24 8:24 7:14; 8:7-8 9:1 9:1 8:1-4 9:3  
9:3 8:22, 24

giih kuny e ge ne ka maa acielo kedea koar gene an uaaya ke gen. Giih acong nahge ke giih me dhaano e naa amuuyo ke kar wiihe abea padh thiel e naa athiele yi muuj.

*Dooj Juog Gihn Gaahn Ke Nying Muuj*

<sup>6</sup> Ngahyu ngo kejea ngaa puur puohdho me thiin, e yoad beel me noog, abea ngaa puur puohdho me duohng, ngo yoad beel me thoohdh. <sup>7</sup> Kwaad dhaano cang cube gihre naa agweehge ke med cwihny, bang gihn, Juog be daahd gihn me cub dhaane ke ngahy aduune e ngo thiel yea. <sup>8</sup> Kare nud yihr Juog ukwaaye wun ke muojo ke giih me thoohdh beere gihn me daahdu me daag tooro. Kedea kare nud yihre umuoje wun ke giih me thoohdh beere gihn me beer tiihyu tiihyo yihr nyoge mooge. <sup>9</sup> Wa kaa agweed yi kitaab Juog naa,

“Ngaa muoj nyoge maa angoohng e cinge be rode lonye be gug.”

<sup>10</sup> Juog e naa ngaa cub kohnho yihr dhaano ne puuro, maa ucube cam. Juog nu thiw, gale giihu ge upaahnge ke kohnho kedea ujwage giih acieg yihru ke nying tiihy abiohgrwaal gihru. <sup>11</sup> Juog cinge buu urode yihru ne meehg wun lonyo ke kwaad giih nyepinye cang, beere wu bar maalo ke kony nyoge mooge thiw ne naang. Noono e nyoge Juog leey ge leeyo ke nying muunye giihu ge acubu ge yoad gene bang wan. <sup>12</sup> Tiihj gihru yugu, ne kony yaa yiih Juog ngo beer thiw bang gihn Juog koohre umuohj nyoge me thoohdhe ke nying gihn atiihyu. <sup>13</sup> Muuj gihru noono nyoadh ngo kejea Juog wuoru wuro ne cohg. Noono e nyoge me thoohdh Juog uleey gene ke nying wuohdo gihru e caahdh tiehd ke yiiho gihru yi Ciig Beer gihr Ngad Boadh nyoge. Kedea ke nying muuj gihru yihr gen kedea nyoge mooge e cingu be rodu. <sup>14</sup> Noono cwihny

gen ayuohd rogu, ukway gene Juog ke nying deeh muuny gihn acub Juoge yihru. <sup>15</sup> Muohju koohr Juog ke nying amahr muuny gihn duohng ke doohngo me be rom ree ke robo.

## 10

### *Poal Rubo Kaa Nying Tiihye*

<sup>1</sup> An, a Poal ngaa teed naa leebea ngej, nea a ne kiinu, kedeá leebea bedh rogu, nea a tooro kiinu, nyingu kwaya kwayo jo wan. Nyingu kwaya kwayo ke dhe yoohn beey Jeacuu maa ngeyo gihre. <sup>2</sup> Nyingu kwaya kwayo kejea leebea keá weehgu doohng bedh cahng beehna bangu. Ne nyoge me koohbo kejea cwihny wan athoohr wane ke yihdh giikh ungoom kan. Kwaad yaa nu ka beehra ngo yihrgen kii ngo ngahya. <sup>3</sup> Keehd me beed wane upiny kan, e wa be kag wa mar yaa upiny. <sup>4</sup> Giikh kag wane keehd gen, padh giikh wiikh piny me neehn toong kedeá mahje. Beehda tee gihrgen Juog e ne cidh wane kar liny keehde. Tee ngo kwaad gihrgen ukuom cang taaye taayo utoor gihrgen me cuung nyume. <sup>5</sup> Tee ni, en ne taaj kwaad gihrgen me yea naa awuohj kedeá utaaje kony rog kejea lum Juog beehda giikh puoge now. Par gihrgen nyoge rom thiel ne wuor Kriihjto neehn jo mahn ge taaj umag gen bang Juog kedeá udoohng gene ne nyoge me nhyaar tiihy gihrgen rob Juoge. <sup>6</sup> Nea ngo aniid wane kejea wuohdo nud yihru ne cohg kaano e ngaa wuor Kriihjto rom wane kaa kihmo.

<sup>7</sup> Rogu keá weehgo kango yihrgen nyepinye giikh niid ke wong wa gihrgen apuohm kuuno. Ngaa cwihnye be diiw kejea ngo ngad Jeacuu, kea boare ngo kaa aduune nea ngo buu ungeye kejea wa jo Jeacuu wa mare. <sup>8</sup> Gihrgen me laahy wiikha

---

9:15 9:15 9:11 10:1 10:1-18 1Kor 9:3 10:1 10:1 10:10; 1Kor 2:3 10:2  
10:2 13:10; 1Kor 13:2 10:4 10:4 6:7; Rom 13:12; Epi 6:13-17 10:6 10:6  
2:9 10:7 10:7 1Kor 1:12 10:8 10:8 13:10

ke nyinge tooro keehd maa atihnga wiha maalo keraahyo kejea wiha adoohng mor ke nying teeg Juog naa acube yihr wan. Tee gihn nu, acub Juoge kaa nying kony wun, padh ke nying raany giihu. <sup>9</sup> A be daahd ngo udoohnga wa ngaa me cej lwahr ke kedh yi yihdhu ge gweeda warga yihru. <sup>10</sup> Ka moogo e ngaa moogo urubo ke nying warga gihra kea, “Ngaan leebe bedh kedea lume teeg nea warga e ne gweede. Abea ngo beehda ngaa me kuohme ne bihdh. Kedea ngo kwihj rob nea ne buud nyoge.” <sup>11</sup> Kwaad ngaa nu rubo wa maano ngahye ngo kejea gihn gweed wane yi warga e wa ne ka me baahr en naa gihn tiihy wane.

<sup>12</sup> Adiehr muon, wa beehda yaa weehne adhaahr ubeel wane wa mar yaa leej rog gen? Ge nyoge me wudh gen tooro. Dhe yoohn beehdo agweehg gene, abea ngo arom gene ke dhe yoohn ka beehd gene kii ngo. Kaano e atag gene kejea dhe yoohn gen noono en ne nyoadh gihn beer kedea gihn raaj. <sup>13</sup> Ke kur mar wan, wa ubeel abea padh beel me bar maalo kuohn muu kuu ateed Juoge. Wa beel kaa nying tiihy acub Juoge yihr wan kedea wu beehda goan tiihy ngo. <sup>14</sup> Me neehn kaano nahgu goan tiihy acub Juoge yihr wan e ngo ngahj thiw kejea wudh kuohn arob Juoge yihr wan wudh gen kuu akaal wane ge anaa abeehn wane bangu ne nyoadh Ciig Beer ke nying Ngad Boadh nyoge. <sup>15</sup> Ke nying gihn nu, wa be kuong beel ke nying tiihj maa ayug nyoge mooge maa abar kuohn muu kuu ateed Juoge yihr wan. Gihn nii ngo, wa ugaahno kejea beehn yiho gihru jwage ree kedea wa ugaahno thiw kejea tiihy wan kiinu ree ujwage keraahyo, beere <sup>16</sup> Ciig Beer rom wane kaa puohnyo yihdh miehr mooge me padh miehyu. Bang gihn wa be beel ke nying tiihj gihr nyoge



mooge maa ayug gene kuohn gen. <sup>17</sup> Ngo agweed yi kitaab Juog naa,  
 “Kwaad ngaa daahd ubeele,  
 dhiile beel kaa nying gihn atiihy Juoge.”

<sup>18</sup> Bang gihn dhaano me beer beehda Juog e naa arob ngo kejea ngo beer padh dhaano e keede e ne rob ngo kejea e beer.

## 11

### *Poal Ree Aleenje*

<sup>1</sup> Cwihnya ne bange kejea magu cwihnyu ne guum luub tooy wihj ge bara maalo ke rob gen. Kea noono magu cwihnyu umeehgu an rob gihi nii cwihnya. <sup>2</sup> A udiero ke wun wa ka dier Juoge ke wun. Wu uroomo ke nyetheamaahn maa amiega yih Jeacuu Ngad Boadh nyoge ucuba wun e wu poohd beehda tongo. <sup>3</sup> Abea a udiero kejea wudhu weehgu ke raanyo wa kwaad gih Eaba e anaa adwaahng thuohle ke luub waane. Noono, e yiho gihr naa ayihu Jeacuu ke cwihnyu acielo me cang lwaayu ke piny upaahru oogo ree. <sup>4</sup> Bang gihn wu kwaad nyoge me be cuung ke kango. Nea ngaa moogo beehn bangu urube ke nying Jeacuu ke rob me ne keede, wale urube ke rob me ne keede ke nying Wahy Juog gihn me ne keede wale puohny Ciig Beer me ne keede, e gihi nu ge yiho yiho. <sup>5</sup> Abea wiha para paro kejea wiha be kaal yaa nu cuohn rog gen ne jo oohr maa apuohny keraahyo. <sup>6</sup> A padh ngaa maa apuohny me ngahy rob nyum nyoge. Abea gahng, gihn nu be nyoadh ngo kejea a beehda ngaa me gihn me ngahya tooro. Lum ni aber wane yihru tiel me thoohdh kede ke dhog yiehdhe me thoohdh.

---

10:17 10:17 1Kor 1:31    10:18 10:18 1Kor 4:4-5    11:2 11:2 Epi 5:25-27  
 11:4 11:4 Gal 1:8-9    11:5 11:5 12:11; 1Kor 15:10; Gal 2:6, 9    11:6 11:6  
 1Kor 2:6-16; Epi 3:4

<sup>7</sup> Ciig Beer apuohnya yihru e akweehn maa akaaba bangu atooro kedea riha anaa alwaaya piny ne dhaano me ne cud ne tihng wudhu maalo. Gihn nu anahg awuohj e naa ayuga ne? <sup>8</sup> Yihdh nihn nu, na nahg ngiihny na oohr akuud yaa ayiiho mooge ge ne miidh an. Noono udoohnge wa ge apeej ne kony wun. <sup>9</sup> Thiow, naa abeehda keewu, keehd me daahda gihr nyepiny, e a akweer ke peehny ngo bangu beere wu be dier ke an. Bang gihn giih daahda ge akahl yaa ayiiho giiho ge abeehno ke yoohn Macedoanya. Riha akoara beere wu be dier ke nying giih daahda, kedea a uke beehdo wa gihn nu. <sup>10</sup> Ngahda athiir e ne roba wa man nud adiehj Kriihjto riha, beena ge beela ni gihn me waar yea tooro yi piny Akaayo. <sup>11</sup> Gihn jo wan! Wu ungaahdo kejea wu be nhyaara ne? Gahng! Ngahy Juoge kejea wu nhyaara nhyaaro. <sup>12</sup> Gihn me gahl an tooro. A ubar maalo ke tiihya noon ni wa kaa coon, beere yaa kang rog gen kejea ge beehda jo oohr, ge be beel kejea tiihy gen uroomo ke tiihj wan.

<sup>13</sup> Kwaad yaa nu, ge beehda jo oohr maa yaa ucahb. Ge nyoge me rob toohd yi tiihy gen, noono ulwaay gene rog gen piny kob gene ge nyoge maa aohr Jeacuue. <sup>14</sup> Gihn me gaahy nyoge kaano tooro. Keehd atiihb ukeehg ke ngude, e ree loge logo udoohnge wa wuohnjuog ngaa meeny piny. <sup>15</sup> Gihn me gaahy nyoge tooro nea baahnge giih atiihb ukeehg rog gen log gene logo udoohng gene wa baahnge giih ngaa maa abiohgrwaal. Cahng gug nihn gen, e ukihm gihr gen unahg gihn me raaj muu uroomo keehd gihn atiihy gene.

### *Giih Ngoohng Wong Naa Ayoad Poale*

---

11:7 11:7 12:13; 1Kor 9:12, 18      11:8 11:8-9 Pihp 4:15-18      11:10 11:10  
 1Kor 9:15-18      11:11 11:11 1Kor 16:24      11:12 11:12 11:5; 12:11      11:13  
 11:13 Pihp 3:2; Any 2:2      11:15 11:15 4:10; Rom 2:6

<sup>16</sup> Lubo bera bero yihru kejea keá ne ngaa par ngo kejea a amuohl. Nea wu ukoohbo kejea wiiha tooro, e kea wiiu an ke tooy wiiha, beer e a ubeel ka me thiin, bang gihn, luma alihngu. <sup>17</sup> Adiehr muon dhe yoohn ka ruba awaahn ni be room ke dhe yoohn ka rub Jeacuu Ruohdh kejea roba ngo. Abea beel gihn ni nyoadh ngo kejea a rubo wa ngaa me wiihe tooro. <sup>18</sup> Beel beehda gih upiny. Nea nyoge ubeel ke nying giih upiny kan, e gihn e ne mahn an ke beel wa mar gen! <sup>19</sup> Wu beehda nyoge me ngahy luube keraahyo e naa ka romu beehdo ka maa cielo keehd nyoge me wudh gen tooro. <sup>20</sup> Keehd ngaa me yug wun ne baahng giihe kedea me kaab kwaad gihn ne yihru kedea me dwaahng wun, wale ngaa me tihng wiihe maalo rogu kedea udhohng wun; kwaad ngaa me tiihy giih nu rogu, kare nud uromu beehdo ka maa cielo keehde. <sup>21</sup> Mara meen kuohma utudo ne rob kwaad giih nu. Kwaad giih me wa giih nu wa atud ke yug gen rogu.

Beeh ruba ke rob ngaa me wiihe tooro. Nea nyoge rom beel ke nying kwaad giih nu, e gihn e ne mahn an ke beel thiow! <sup>22</sup> Yaa ni beel ke giih upiny kan ge beehda jo kee? Nea ge beehda yaa Judea, e a beehda Ujudea thiow. Nea ge beehda yaa Yijarael, e a beehda ngad Yijarael. Nea ge beehda kwaay Abraahm, e a beehda kwaar Abraahm thiow. <sup>23</sup> \*† Keehd ma ngahya ngo kejea piehj gihra padh kare, e a upeehyo kejea ge yaa tiihj giih Jeacuu ne? Giih me thoohdh ge ayug riha maa akaal wudh muu ayoad gene cang. A naa ngaa atiihyo yih Jeacuu. A akedh yi thijin tiel me thoohdh ke nying tiihj gihn ni. A apuohd ke keedo tiel me thoohdh kedea ubodha yi thoo tiel me thoohdh thiow. <sup>24</sup> Yaa Judea, a apuohd gene tiel abiihj, gihn maa

---

11:16 11:16 12:6 11:22 11:22 Pihp 3:5; Rom 11:1 \* 11:23 11:23-29  
4:8-12; 1Kor 4:11-13; 12:26 † 11:23 11:23 Tiihj ne cohg: 1Kor 15:10Thijin:  
Tiihy 16:23

apoohto acielo cog beehda ngeere kar dhaano aduuno wonge apaar wonge abiihj Bengween<sup>25</sup> Apahn Roama, a along gene ke lodhe tiel adahg, kedea a abahn ke leele ne cielo. Thiow, tiel adahg e yaahy urahnyo udiihre piny yi diehr naam duohng kedea cahng man a abeehdo yi diehr naam me duohng ke kar bad cahng acielo, maa dewaahr e naam cej an ke camo.<sup>26</sup> Yi waahdha noono abuoehja ke wen piny ne puohny Ciig Beer, giij raahyo ge ayoada. Ge ayoada yi yihdh nahme, kedea bang yaa kahw kedea jo paar wan maa aleye. Giij me reje ge ayoada yi geew kedea yi paajo. Ge ayoada thiow yi naam duohng kedea uyoada gen bang yaa ucahb ge koohbo kejea ge nyoge maa aohr Jeacue.<sup>27</sup> A abuoehj ke tiijh kedea tiel me thoothd e ka me roma niine tooro. Thiow kahj maa riow a abang gene tiel me thoothd. Kedea a abeehdo e kar budo tooro yihra wale waaro me wuma wiija.<sup>28</sup> Padh giij nu ge ne daahda ukwaan gen cang, adoohnge diero ke nying akuud yaa yiho padh giijh me roba.<sup>29</sup> E niida ngo e ngaa me cwihnye bahw nud, e riha niida wa cwihnya bahw thiow. E dwaahng dhaano ne yug anyoohne, e cwihnya uleehdo wa maaj.

<sup>30</sup> Nea kare nud kejea a ubeel, e a beel kaa nying giijh me nyoadh ka nahga adooro kii ngo.<sup>31</sup> Juog wur Jeacuu Ngad Boadh nyoge nyepinye ge ngahye cang. Juog e leej ke wong ke wong ngo ngahye kejea a be rob toohd.<sup>32</sup> Naa abeehda yi geen Damajko, e muudiihr yi dhaahr ruohdh duohng cuohn naa Aritoaj, amor anaa acube kejea tieg geew piny beere a ke mago.<sup>33</sup> A abeehn Juog ne konyo, naa abeehn an ne lwaay piny ke diido ke wong alwiidh maa aloaya riha oogo ubahng e kuu amag.

---

11:25 11:25 Tiijh 14:19; 16:22      11:26 11:26 Tiijh 9:23; 14:5      11:27 11:27  
6:5      11:29 11:29 1Kor 9:22; Gal 6:2      11:30 11:30 12:5; 1Kor 1:31      11:31  
11:31 1:23      11:32 11:32-33 Tiijh 9:23-25

## 12

*Muuny Juog E naa Gihn Daahdo*

<sup>1</sup> Ngahya kejea gihn me kony beele yihra tooro. Abea keehd maano, e a dhiil bar maalo ubeela. Awaahn ni, cwihnya ne rob ke nying giih maa aniida yi laahg kede a ke nying giih maa anyoadh Juoge yihra. <sup>2</sup> Wiiha kuu awul yi gihr ngaa maa anaa ayiih Jeacuu. Run apaar wonge angween ge abar awaahn naa beehn ngaan nu ne tihng maalo ka me baahr yi dhaahr Paar Maalo. Kwihya nea ngo amon Paar Maalo ke kuohme cang wale wahye keede ge naa acidho. Beehda Juog e ne ngahy ngo. <sup>3</sup> Lubo bera bero kejea ngo kwihya nea ngaan nu amon Paar Maalo ke kuohme cang wale wahye keede ge naa acidho. Beehda Juog e ne ngahy ngo. <sup>4</sup> Abea ngo ngahya kejea anahg kun nu e naa alihnge giih me be rom robo kede a ngaa me rom rob gen tooro. <sup>5</sup> Kwaad ngaan nu, ngo roma kaa puojo. Abea ka me leeya riha tooro nea padh ke nying giih nyoadh adooya. <sup>6</sup> Nea cwihnya ne uleeya riha, e a wa ngaa me wiiha tooro, bang gihn, a rob gihn maa athiir. Abea gahng riha be leeya. Riha be leeya bang gihn cwihnya toor bang ubeehn dhaane uleeye an ukaale wiih gihn aniide e tiihya tiihyo kede a gihn alihnge e roba robo.

<sup>7</sup> Koadho abeehn ne cob yi deehn kuohma, beere a be beel ke nying giih gaahy nyoge ge anyoadh Juoge yihra yi Paar Maalo. Noono udoohnge wa baahng me tiihy yihr atiihb ukeehgyi kuohma. Kede a ngo beehdo kaa puohd an beere a be beel ke nying giih anyoadh yihra. <sup>8</sup> Wong Juog akwaya tiel adahg kejea lwahge an ukahle gihn ni oogo riha. <sup>9</sup> Maa aduog Juog wiih luma kea, “Muuny gihra e naa gihn daahd cog. Dooyi e ne jwag teega rihi.” Lum nu abeehr Juoge cwihnya med ne beel keter ke nying gihn

nahga adooro beere tee Kriihjto yoada yoado. <sup>10</sup> Dooya noon ni, cwihnya med yi ngo ke nying Jeacuu. Cwihnya med thiw nea a ke yenyo, nea gihn me teeg apahdh wiiha nea giih ajohr ke yugo riha nea a nii gihn me raaj. Bang gihn dooya e ne yug an ne ngaa me teeg.

*Poal Dier Kaa Nying Yaa Korindh*

<sup>11</sup> Ngo ayiia riha kejea wiiha tooro, abea beehda wun naa athiel an yi tooy wihj. Nea kare, e a nuu leeyo wa mar yaa cuohn rog gen ne jo oohr maa apiehj. Keehd ma atoor gihr nyinga, e gihn me yoohm gene an keehde tooro keehd ma tihng gene wudh gen maalo. <sup>12</sup> Giih me thoohdh me gaahy nyoge me nyoadh ngo kejea a beehda ngaa maa akwany Juoge ne ngad oohr gihre, ge anaa ayuga nyumu e a be dhaahr. <sup>13</sup> Gihn e ne kaa tiihyo keewu ne rom wudhu keehd akuud yaa yiiho giih ne kuohn mooge? Ngahda ngiihny ge kaa kaabo bangu e ne bahng wudhu be room keehd gen ne? Nea gihn nu beehda awuohj kea wiiu lubo piny yihra.

<sup>14</sup> Awaahn ni, riha agwiira ne liew wun beere tiena rom adahg bangu. Kedea ngiihny me daahda bangu tooro. A be daahd giih ne yihru, a daahd kihdu cog. A neehn wuru. Padh nyethiin e ne muodh wahn ge ke men, abea beehda ge wahn ge ne muodh nyethiin. <sup>15</sup> Cwihnya med keraahyo ucuba kwaad giih ne yihra ke nying giih daahdu. Keehd kuohma thiw e ngo cuba cubo ke nyingu. Nhyaahr nyaara wun ngo duohng keraahyo abea nyaahr gihru thiin. <sup>16</sup> Kare cog! Ngahyu ngo kejea ngaa maa adiero tooro kiinu ke nying giih daahda. Abea gahng, ne nyoge me rubo ke piny kejea a Poal, a beehda ngad waane me tuohr nying nyoge. <sup>17</sup> Nyingu atuohra ke weehne? Yaa

---

12:12 12:12 Tiihy 13:6-12; 14:8-10; 16:16-18; 19:11-16; Rom 15:19 12:13  
 12:13 11:7-9 12:14 12:14 13:1 12:15 12:15 1Kor 16:24 12:17 12:17  
 7:2

ne oohra bangu, ka moogo e nyingu atuohr gene ne? <sup>18</sup> Tiihtuj ngaa aohra bangu, wonge anaa kuonga ke kwayo, umodho, ci aaye keehd ngad yiiho gihn acaahdho keehde. Nyingu anaa atuohr Tiihtuje ne? Tiihj gihr Tiihtuj kedea dhe yoohn caahdhe kii ngo ngahda ge uroomo ke mara ne?

<sup>19</sup> Ka moogo e wudhu paru paro kejea giih cang ge roba ne jaahy rog wan nyumu ne? Bekihde, padh wa maano. Wa rubo wa gihn nu neehn nyoge me ne nyum Juog maa ayiih Jeacuu Ngad Boadh nyoge. Goma maa anhyaara, giih ni cang ge yug wane kaa nyingu ne kony wun. <sup>20</sup> Cwihnya udaag kejea nea a beehn bangu, e wu yuuda kaa dhe yooh me padh kar cwihnya ne daahda, kedea a yuudu kaa dhe yooh me padh kar cwihnyu. Cwihnya udaag kejea wu uyuuda e weehr maa tiel kedea rahny cwihny ge naa giihu ne tiihyu. Kedea wu uyuuda e yihdhu apaah kedea wu beehdo kaa yeny rogu maa ke waaj rog. Wu uyuuda thiow e wu peem thoohn kob ngaa man kea en ne wiihe ne maalo ngaa me room keehde tooro, kedea wu uyuuda e paajo alyaahbu. <sup>21</sup> Cwihnya udaag thiow, kejea ge ubeehna bangu e Juog wiiha umeehge laahyo nyumu. A uyuog ke piih wonga ge uniida yaa anaa ayug adhemuohm coon abea cwihny gen kuu arahnyo rog adhemuohme giih gen. Adhemuohme me neehn giih bal kedea kaab maahn maa tiihy giih me maahn.

## 13

<sup>1</sup> Yi waahdha e beehna bangu awaahn ni, e naa dahg waahdh gihra bangu.

“Nea gihr ukuom maa atiihy ree nud,

e cuude ariow wale adahg lum gen dhiil kaa lihngo umodho beere gihn nu ke teedo naa athiir,” wa kaa agweede yi kitaab Juog. <sup>2</sup> Yi riown waahdha, wu anaa toohna. Awaahn ni ngo bera bero utoohna wun e a tooro bangu. Yi waahdh beehna bangu yaa ayug adhemuohm coon kede a dhaano cang kiin kwaad yaa ayug anyoohne ge buu ubodh yi ukihm gihra. <sup>3</sup> Adiehr e ne roba yihru. Gihn nu e ne nyoadh gihn daahdu ne ngey ngo kejea Jeacuu e ne rubo yi wiha. Yi tiihy Jeacuu kiinu, ngo padh adooro abea tee gihre duohng keter. <sup>4</sup> Jeacuu anaa agur rih yaadh maa ariihw e tee tooro ree. Abea awaahn ni ngo beehdo kaa tee gihr Juog ree. Ke dhe yoohn nu acielo, e tee tooro rog wan. Abea wa beehdo thiw kaa tee gihr Juog ne tihj yihru.

<sup>5</sup> Wu do, tumu rogu ne caadh yaa aduunu ne ngey ngo nea Jeacuu ayiihu ne cohg wale kuu ayiihu. Niidu niido kejea Jeacuu ne rogu ne? Nea kuu aniidu kejea Jeacuu ne rogu, e utum gihru naa acaadh yihdhu kuu acidh kare. <sup>6</sup> Cwihnya be diiw kejea romu kaa ngeyo kejea ke kur mar wan utum gihr wan naa acaadh wane aduun wan apahdh kare. <sup>7</sup> Juog e ne kway wane ne kony wun utiihyu gihn me beer. Wa ukwahyo padh ke nying urobe kejea utum gihr wan naa acaadh wane aduun wan apahdh kare. Abea beere gihn me beer romu kaa tiihyo keehd me doohnge wa utum gihn acaadh wane aduun wan ngo kuu apahdh kare. <sup>8</sup> Kare tooro ugahl wane dhe yoohn gihn maa athiir bang gihn wa tiihy gihn maa athiir. <sup>9</sup> Keehd me toor tee rog wan, e cwihny wan med keter e niid wane ngo e tee nud yihru. Kede a Juog kway wane kwayo ke nyingu beere rogu yugu yugo ne nyoge me tiihy gen en ne beer. <sup>10</sup> E

---

13:2 13:2 1:23; 10:11; 12:20; 13:10      13:4 13:4 12:9-10; 1Kor 1:25; Pihp 2:7-8  
13:10 13:10 13:2; 10:8; 1Kor 4:21



naa gihn agweeda giih yihru e a poohd ne ka me baahr, beere cahng wahnha bangu, e a be daahd urubo ke dhe yoohn tee gihn acub Jeacuue yihra. Ngo beehda tee maa acub kaa nying mag wun beer mee ubaru maalo. Ngo kuu acub kaa nying rwaahny nyingu.

### *Maahdh*

<sup>11</sup> Jo wan, yi gug luube, beehda wiihwo e ne wiihwa wun. Yugu rogu ne nyoge me tiihy gen en ne beer kedea tiihyu giih roba. Madu lubo naa acielo ke keewu, ubeehdu e doohr ne keewu, kaano arumo e Juog ngad nhyaahro kedea ngaa kahl doohr kiin nyoge en ke ngude ubeehn ne beehdo keehd wun.

<sup>12</sup> Maahdhu rogu naa aciel acielo ke cing apaar. <sup>13</sup> Jo yiiho giih kan cang wu amaahdh gene.

<sup>14</sup> Beehn muuny Jeacuu Kriihjto Ruohdho, kedea nhyaahro gihr Juog, maa nweehd gihr Wahy Juog beehd gene ke wun ne dug.

## Anweehd Me Nyaahn

Luwo: Anweehd Me Nyaahn New Testament

copyright © 2003 Wycliffe Bible Translators, Inc.

Language: (Luwo)

Contributor: Wycliffe Bible Translators, Inc.

All rights reserved.

2020-11-18

---

PDF generated using Haiola and XeLaTeX on 14 Jun 2022 from source files dated 13 Jun 2022

ba8353b1-57d5-55f2-870a-7ae8e7acbe62